

## Kelab Rotary PJ kutip dana RM21,000 hasil jual kebaya

KUALA LUMPUR 13 Ogos - Kelab Rotary Petaling Jaya berjaya mengumpulkan dana sebanyak RM21,000 hasil lelongan baju-baju kebaya eksklusif untuk menjayakan projek membantu kanak-kanak pesakit barah, baru-baru ini.

Presiden Kelab tersebut, H.S Dharan berkata, majlis lelongan tersebut diadakan sempena Pertunjukan Fesyen Amal Miss Malaysia yang digayakan oleh para peserta pusingan peringkat akhir Miss Kebaya Selangor 2013 yang diadakan di Petaling Jaya dan turut dihadiri oleh para jempunan dan selebriti terkenal.

"Sebanyak 22 pasang kebaya yang direka khas oleh barisan pereka muda tempatan yang sedang mencipta nama itu berjaya mendapat sambutan hangat dalam

semangat mereka untuk membantu kanak-kanak yang menderita sakit barah," katanya dalam kenyataan akhbar di sini.

Menurutnya, dana tersebut bagi menjayakan projek Golden Child yang bertujuan bagi memberi peluang kepada kanak-kanak tersebut untuk pergi bercuti selama tiga hari ke Kota A Famosa di Melaka bersama ibu bapa dan kaum keluarga masing-masing.

"Ini semata-mata bagi memberikan keriangian kepada kanak-kanak tersebut yang terpaksa menanggung kesakitan dan sekali gus memberikan semangat yang lebih kepada mereka untuk terus berjuang melawan penyakit tersebut," katanya.

Dharan berkata, projek itu dilaksanakan dengan mendapat kerjasama pihak hospital kerajaan dan justeru itu para doktor dan jururawat akan turut serta dalam lawatan selama tiga hari itu.

"Projek ini mendapat sambutan setiap tahun dan kami berharap para dermawan dan orang ramai akan terus menyokong projek ini yang cukup memberikan makna yang besar kepada para pesakit dan dunia perubatan dan rawatan di negara ini," katanya.



PESERTA yang menyertai Pertandingan Miss Kebaya Selangor 2013 bersedia untuk memperagakan baju kebaya sempena Pertunjukan Fesyen Amal Miss Malaysia di Petaling Jaya, Selangor, baru-baru ini.